



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐԴԱՐԱԴԱՏՈՒԹՅԱՆ ՆԱԽԱՐԱՐՈՒԹՅԱՆ
ԱՇԽԱՏԱԿԱԶՄԻ ՕՐԻՆԱԿԱՆՈՒԹՅԱՆ ՎԵՐԱՀՍԿՈՂՈՒԹՅԱՆ
ՏԵՍՉՈՒԹՅՈՒՆ**

010 Երևան, Վ. Սարգսյան 3/8, հեռ. /010/ 59-41-41

ՈՐՈՇՈՒՄ

Վարչական տույժ նշանակելու մասին

30.11.2016թ.

ք.Երևան

ՀՀ ԱՆ աշխատակազմի օրինականության վերահսկողության տեսչության (այսուհետ՝ Տեսչություն) պետ Միքայել Մինասյանս՝ ուսումնասիրելով «Մեր քաղաքը մեր տունն է» սոցիալական հիմնադրամի (գրանցման համար՝ 222.160.00266, (այսուհետ՝ Հիմնադրամ) տնօրեն Արմինե Հայրապետյանի կողմից Տեսչության պետի՝ վարչական տույժ կիրառելու մասին որոշման պահանջը չկատարելու կապակցությամբ 14.11.2016թ.-ին հարուցված վարչական վարույթի նյութերը.

ՊԱՐԶԵՑԻ

Տեսչության պետի 30.09.2016թ.-ի որոշմամբ Հիմնադրամի տնօրեն Արմինե Հայրապետյանի նկատմամբ «Հիմնադրամների մասին» ՀՀ օրենքի 39-րդ հոդվածի և Տեսչության պետի կողմից 10.06.2016թ.-ին վարչական տույժ՝ «Նախազգուշացում» կիրառելու մասին որոշման պահանջները չկատարելու համար, համաձայն՝ Վարչական իրավախախտումների վերաբերյալ ՀՀ օրենսգրքի (այսուհետ՝ Օրենսգիրք) 169¹⁸-րդ հոդվածի 2-րդ պարբերության, նշանակվել է վարչական տուգանք՝ 50.000 (հիսուն հազար) ՀՀ դրամի չափով: Նույն որոշմամբ Հիմնադրամի տնօրեն Արմինե Հայրապետյանը նախազգուշացվել է նաև, որ վերջինս պարտավոր է որոշումն ստանալու օրվանից երեսուն օրվա ընթացքում ՀՀ արդարադատության նախարարի 2009թ. դեկտեմբերի 24-ի թիվ 319-Ն հրամանով սահմանված կարգով՝ Հիմնադրամի 2015թ.-ի գործունեության մասին հաշվետվությունը հրապարակել ՀՀ հրապարակային ծանուցումների պաշտոնական ինտերնետային կայքում (այսուհետ՝ www.azdarar.am Կայք) և այդ մասին ծանուցել Տեսչությանը:

Տեսչության պետի 30.09.2016թ.-ի վարչական տույժ նշանակելու մասին որոշումը Օրենսգրքի 283-րդ հոդվածով սահմանված կարգով 07.10.2016թ.-ին ուղարկվել է Հիմնադրամի տնօրենի հաշվառման հասցեով (ՀՀ, ք. Երևան, Ռուբինյանց 20-45.), այսուհետև Օրենսգրքի 283-րդ հոդվածի 4-րդ պարբերությունը հաշվի առնելով՝ Տեսչության պետի 30.09.2016թ.-ի վարչական տույժ նշանակելու մասին որոշումը 07.10.2016թ.-ին տեղադրվել է ՀՀ հրապարակային ծանուցումների պաշտոնական ինտերնետային կայքում:

Օրենսգրքի 283-րդ հոդվածի 4-րդ պարբերության համաձայն՝ «Եթե անձի (որին ուղարկվել է որոշումը) հայտնած հասցեով ուղարկված որոշումը վերադարձվել է, կամ ծանուցման փաստը չի հաստատվել, կամ հասցեատերը հրաժարվել է ստանալ պատշաճ կարգով ուղարկված (հանձնվող) որոշումը և ստորագրել հրաժարվելու մասին, ապա որոշումն ուղարկվում է այդ անձի հաշվառման հասցեով (եթե անձի հայտնած հասցեն տարբերվում է նրա հաշվառման հասցեից) և տեղադրվում Հայաստանի Հանրապետության հրապարակային ծանուցումների պաշտոնական ինտերնետային կայքում: Այն դեպքերում, երբ որոշումն ուղարկվում է անձի հաշվառման հասցեով և տեղադրվում Հայաստանի Հանրապետության հրապարակային ծանուցումների պաշտոնական ինտերնետային կայքում, որոշումը համարվում է հանձնված (պատշաճ ծանուցված) որոշումն ինտերնետային կայքում տեղադրելու օրվան հաջորդող երրորդ օրը»:

Հարկ է նշել, որ հանձնման օրվանից՝ 10.10.2016թ.-ից, հաշվարկված երեսուն օրվա ընթացքում Հիմնադրամի 2015թ. գործունեության մասին հաշվետվությունն օրենքով սահմանված կարգով և ժամկետներում չի հրապարակվել www.azdarar.am կայքում:

Տեսչության պետի կողմից հարուցված վարչական վարույթի շրջանակներում Օրենսգրքի 255-րդ հոդվածով նախատեսված վարչական իրավախախտում կատարելու մասին արձանագրություն կազմելու նպատակով Հիմնադրամի տնօրեն Արմինե Հայրապետյանը հրավիրվել է Տեսչություն (ծանուցումը 17.11.2016թ.-ին հրապարակվել www.azdarar.am կայքում), սակայն գործի քննության ժամանակի և վայրի մասին ծանուցված լինելով, վերջինս չի ներկայացել լսումներին:

Ելնելով վերոգրյալից, ղեկավարվելով Վարչական իրավախախտումների վերաբերյալ ՀՀ օրենսգրքի 169¹⁸-րդ հոդվածի 3-րդ պարբերությամբ, 223¹-րդ հոդվածով և 282-րդ հոդվածի 1-ին մասով.

ՈՐՈՇԵՑԻ

1. «Մեր քաղաքը մեր տունն է» սոցիալական հիմնադրամի տնօրեն Արմինե Հայրապետյանի (անձնագիր՝ AC0347414, հասցե՝ ք. Երևան, Ռուբինյանց 20-45) նկատմամբ նշանակել վարչական տուգանք՝ 200.000 ՀՀ դրամի չափով:

2. «Մեր քաղաքը մեր տունն է» սոցիալական հիմնադրամի տնօրեն Արմինե Հայրապետյանին նախազգուշացնել որոշումն ստանալու օրվանից **երեսուն օրվա** ընթացքում հիմնադրամի 2015թ.-ի գործունեության մասին հաշվետվությունը հրապարակել www.azdarar.am կայքում և արդյունքների մասին ծանուցել Տեսչությանը՝ կից ներկայացնելով վարչական տույժի՝ ՀՀ պետական բյուջե (հաշվեհամար՝ 900005242111) վճարված լինելու հանգամանքը հավաստող փաստաթուղթը կամ դրա պատճենը:

3. Սույն որոշումն ուժի մեջ է մտնում վարույթի մասնակցին այն հանձնելուն հաջորդող օրվանից և կարող է բողոքարկվել վերադատության կարգով ՀՀ արդարադատության նախարարին երեսուներորդ ժամկետում կամ օրենքով սահմանված կարգով և ժամկետում ՀՀ վարչական դատարան:

ՏԵՍՉՈՒԹՅԱՆ ՊԵՏ՝

ՄԻՔԱՅԵԼ ՄԻՆԱՍՅԱՆ